

# L'HICHTOIRE "LES TRÂS PETETS POÛES"

El était in còp trâs petéts poûes. Lo djoé airriva po yos, de tyittie lai majon de yote mére.

- « A revoèr més afaints, conchtruisèz-vos ène bèle majon, mains prentes diaidge qu'èlle feuche bîn sòlide po qu'lo grand métchaint loup ne poyeuche pe entraie vos maindgie. »

Lés trâs petéts poûes paichaint tus dains ène direction diff'rente.  
Lo premie airrivait tchu in grand tchaimp ét se conchtruisit ène majon tot en étrain.  
Lo s'cond paichit en direction dés bôs ét se conchtruisit ène majon tot en bôs.  
Lo derie décida de pâre son temps ét se conchtruisit ène bèle majon en pi(e)rre.  
In còp yot' ovraidge finit, lés dous premies petéts poûes vaint vouere yot' grand frère ét se fotant de lu :

- « Ah, ah, ah ! te n'és toûedge pe fini tai majon, lai mi(e)nne ât finit dâs in bon môment ! Mitenaint, i vais poyait m'aimusaie » breuyait lo premie.

- « Ah ah ô moi aije bîn, te dairais léchie tchoire tés pi(e)rres ét veni djûere aivo nos » i dit lo s'cond.

- « Rirait bîn c'tu que rirait lo derie, lo traivaiye ât toûedge récompensaie » répondit lo trajieme petét poûe que se rebote aichetôt à traivaiye.

Et poétchaint ce derie n'aivait p' toûe. Musèz in pô tiu ât-ce que raviétait lés trâs petéts poûes en se léchaint lés babines ? LO LOUP !

El airriva tchéz lo premie petét poûe ét çhouçha tchu sai majon en étrain que s'envoula aichetôt !

El airriva tchéz lo s'cond petét poûe, çhouçha in grand còp ét lai majon de bôs s'envoula aije bîn !

Lés dous poûes s'en allaint en ritaint tchéz yot' grand frère.

Lo loup s'appreutcha de lai majon de pi(e)rre, çhouçha , çhouçha , encoé èt encoé.....  
Mains lai majon ne boudgeaie pe.

- « I ne vais pe me léchie faire ! dit lo loup noi de graingne. I finirai bîn pai lés maindgie cés trâs petéts poûes, pairôles de loup! I sais ; i ve montaie tchu lo toit èt entrae pai lo tyué ! »

Tiaind lo trajieme petét poûe vit ce que lo loup faisait, è bote ène grosse tiaisse rempiachue d'âve bîn tchâde tchu lo fûe. Et djeute à môment laivou lo loup airriva, è rôte lo tyuiétche.

Plouf ! Lo loup tchoi dains l'âve tchâde.

E se breule ét s'enfut en ritaint de lai majon !

Lés petéts poûes décidant de v'nis vivre tos lés trâs dains lai majon de pi(e)rre ét ès n'aint pus djemais revu lo loup !

